

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**Z A K O N  
O IZMJENAMA I DOPUNAMA ZAKONA O SUDOVIMA U  
FEDERACIJI BOSNE I HERCEGOVINE**

**Sarajevo, juli 2012. godine**

## **PRIJEDLOG**

Za donošenje Zakona o izmjenama i dopunama Zakona o sudovima u Federaciji Bosne i Hercegovine:

Postupajući u smislu odredaba člana 26. Poslovnika o radu Vlade Federacije Bosne i Hercegovine – prečišćeni tekst („Službene novine Federacije BiH“, br. 6/10, 37/10 i 62/10) predlažemo donošenje Zakona o izmjenama i dopunama Zakona o sudovima u Federaciji Bosne i Hercegovine po skraćenom postupku. Kao osnovni razlog za donošenje ovog zakona po skraćenom postupku ističemo da se u konkretnom slučaju ne radi o složenom i obimnom zakonu te da su u tom smislu ispunjeni uvjeti iz člana 172. Poslovnika Zastupničkog doma Parlamenta Federacije Bosne i Hercegovine („Službene novine Federacije BiH“, br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09).

**Z A K O N**  
**O IZMJENAMA I DOPUNAMA ZAKONA O SUDOVIMA U FEDERACIJI BOSNE I**  
**HERCEGOVINE**

**Član 1.**

U Zakonu o sudovima u Federaciji Bosne i Hercegovine („Službene novine Federacije BiH“, br. 38/05, 22/06, 63/10 i 72/10), u članu 22. stav 1. tačka 4) mijenja se i glasi:

„4) Općinski sud u Sanskom Mostu za područje općine Sanski Most. Općinski sud u Sanskom Mostu ima odjeljenje izvan sjedišta suda u Ključu za područje općine Ključ;“.

U stavu 3. tačka 2) mijenja se i glasi:

„2) Općinski sud u Gradačcu za područje općine Gradačac;“.

Iza tačke 2. dodaje se nova tačka 3) koja glasi:

„3) Općinski sud u Srebreniku za područje općine Srebrenik;“.

Dosadašnje tač. 3), 4), 5), 6) i 7) postaju tač. 4), 5), 6), 7) i 8).

U stavu 6. tačka 1) mijenja se i glasi:

„1) Općinski sud u Travniku za područje općina Travnik i Busovača. Općinski sud u Travniku ima odjeljenja izvan sjedišta suda, i to odjeljenje u Vitezu za područje općine Vitez i odjeljenje u Novom Travniku za područje općine Novi Travnik;“.

U stavu 7. tačka 2) mijenja se i glasi:

„2) Općinski sud u Konjicu za područje općina Konjic i Jablanica. Općinski sud u Konjicu ima odjeljenje izvan sjedišta suda u Prozoru-Rami, za područje općine Prozor-Rama;“.

Iza stava 10. dodaje se novi stav 11. koji glasi:

„Novoosnovani Općinski sud u Srebreniku i novoosnovano odjeljenje Općinskog suda u Sanskom Mostu, odjeljenja Općinskog suda u Travniku i odjeljenje Općinskog suda u Konjicu, započet će s radom kada se ispune neophodni uvjeti za rad sudova.“

## **Član 2.**

Iza člana 46. dodaje se novi član 46a. koji glasi:

### **„Član 46a. Sudski izvršilac**

Po nalogu sudije sudski izvršilac provodi sve ili pojedine izvršne radnje na način i u roku određen u zaključku suda, u skladu sa propisom kojim se uređuje izvršni postupak.

Sudski izvršilac mora imati IV stepen školske spreme, stručni ispit za sudskog izvršioca i najmanje jednu godinu radnog staža.“

## **Član 3.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

## **O B R A Z L O Ž E N J E**

### **Z A K O N A O IZMJENAMA I DOPUNAMA ZAKONA O SUDOVIMA U FEDERACIJI BOSNE I HERCEGOVINE**

#### **I – USTAVNI OSNOV**

Ustavni osnov za donošenje ovog zakona sadržan je u odredbi člana IV. A 20. (1) d) Ustava Federacije Bosne i Hercegovine, kojom je propisano da je pored ostalih ovlasti Parlament Federacije BiH mjerodavan za donošenje zakona o obnašanju dužnosti federalne vlasti. Naime ovim zakonom uređuju se pitanja organizacije, ovlasti, finansiranja i druga pitanja od značaja za organizaciju i funkcioniranje općinskih sudova, kantonalnih sudova i Vrhovnog suda Federacije Bosne i Hercegovine, a što spada u obnašanje dužnosti federalne vlasti, stoga navedena odredba predstavlja ustavni osnov za njegovo donošenje.

#### **II – RAZLOZI ZA DONOŠENJE ZAKONA**

Predstavnički dom Parlamenta Federacije BiH na nastavku 15. redovne sjednice održane dana 30.05.2012. godine, prihvatio je Analizu o mreži sudova u Federaciji BiH, urađenu od strane Visokog sudskog i tužilačkog vijeća BiH, te je usvojen Zaključak kojim se nalaže priprema Zakona o izmjenama i dopunama Zakona o sudovima u Federaciji BiH. Naloženo je da predložene izmjene i dopune postojećeg zakonskog teksta idu u smjeru osnivanja novog Općinskog suda u Srebreniku, zatim odjeljenja Općinskog suda u Sanskom Mostu za područje općine Ključ i dva odjeljenja Općinskog suda u Travniku za područja općina Vitez i Novi Travnik. Također, predloženom izmjenom formira se i odjeljenje Općinskog suda u Konjicu za područje općine Prozor-Rama.

Dakle, u članu 1. Nacrta zakona o izmjenama i dopunama Zakona o sudovima u Federaciji BiH, korigovan je postojeći tekst na način da je formiran Općinski sud u Srebreniku za područje općine Srebrenik, dok je u postojećem sistemu općinskih sudova postojalo odjeljenje Općinskog suda u Gradačcu za područje općine Srebrenik što znači da se umjesto odjeljenja sada formira novi sud za predmetno područje. Nadalje, u Općinskom sudu Sanski Most, zatim Općinskom sudu Travnik i Općinskom sudu Konjic formiraju se odjeljenja van sjedišta suda koja do sada nisu postojala. Na ovaj način vrši se proširenje mreže sudova u Federaciji BiH koje ima za cilj da olakša građanima ostvarivanje njihovih elementarnih prava, prije svega pojednostavljen i olakšan način pristupa pravosuđu.

Pomenutim zaključkom također je navedeno i osnivanje odjeljenja suda u Čitluku, koje objektivno nije moguće iz razloga što je Zakonom o izmjenama i

dopunama Zakona o sudovima u Federaciji BiH („Službene novine Federacije BiH“ broj: 62/10) propisano osnivanje Općinskog suda u Čitluku, za područje općine Čitluk, dok je do tada za ovo područje bio nadležan Općinski sud u Mostaru. Obzirom da je u članu 16. Zakona o sudovima, propisano da se općinski sudovi obrazuju za područje jedne ili više općina u kantonu, nezakonito je formiranje bilo kakvog odjeljenja pri Općinskom sudu u Čitluku.

Članom 2. se propisuju opći uvjeti koje mora ispunjavati sudski izvršilac. Uzimajući u obzir da važeći Zakon o sudovima u Federaciji Bosne i Hercegovine nije sadržavao odredbe koje su regulirale status sudskih izvršilaca kao i opće uvjete koje isti moraju ispunjavati neophodna je bila intervencija na zakonskom tekstu u ovom dijelu.

#### **IV- FINANSIJSKA SREDSTVA**

Prema odredbi člana 68. stav 2. Zakona o sudovima u Federaciji BiH, sredstva za rad kantonalnih i općinskih sudova osiguravaju kantoni. Također treba imati u vidu da su predložene izmjene inicirane već pomenutom analizom Visokog sudskog i tužilačkog vijeća BiH o mreži sudova u Federaciji BiH koju je Zastupnički dom Parlamenta Federacije BiH prihvatio.

ZAKON O SUDOVIMA FEDERACIJE BIH-  
DIO KOJI SE MIJENJA I DOPUNJUJE

Član 22.

**Sjedište i područje općinskih sudova**

**Općinski sudovi u Unsko-sanskom kantonu su:**

- 1) Općinski sud u Bihaću za područje općina Bihać i Bosanski Petrovac;
- 2) Općinski sud u Bosanskoj Krupi za područje općina Bosanska Krupa i Bužim. Općinski sud u Bosanskoj Krupi ima odjeljenje izvan sjedišta Suda u Bužimu, za područje općine Bužim;
- 3) Općinski sud u Cazinu za područje općine Cazin;
- 4) Općinski sud u Sanskom Mostu za područje općina Sanski Most i Ključ;
- 5) Općinski sud u Velikoj Kladuši za područje općine Velika Kladuša.

**Općinski sud u Posavskom kantonu je:**

Općinski sud u Orašju za područje općina Orašje, Domaljevac-Šamac i Odžak.

**Općinski sudovi u Tuzlanskom kantonu su:**

- 1) Općinski sud u Gračanici za područje općina Gračanica i Doboj-Istok;
- 2) Općinski sud u Gradačcu za područje općina Gradačac i Srebrenik. Općinski sud u Gradačcu ima odjeljenje izvan sjedišta Suda u Srebreniku, za područje općine Srebrenik;
- 3) Općinski sud u Kalesiji za područje općina Kalesija, Teočak i Sapna;
- 4) Općinski sud u Tuzli za područje općina Tuzla i Čeli};
- 5) Općinski sud u Živinicama za područje općina Živinice i Kladanj. Općinski sud u Živinicama ima odjeljenje izvan sjedišta Suda u Kladnju, za područje općine Kladanj;
- 6) Općinski sud u Lukavcu za područje općine Lukavac;
- 7) Općinski sud u Banovićima za područje općine Banovići.

**Općinski sudovi u Zeničko-dobojskom kantonu su:**

- 1) Općinski sud u Kaknju za područje općine Kakanj;
- 2) Općinski sud u Tešnju za područje općina Tešanj, Usora i Doboj-Jug;
- 3) Općinski sud u Visokom za područje općina Visoko, Vareš, Olovo i Breza. Općinski sud u Visokom ima odjeljenje izvan sjedišta Suda u Olovu, za područje općine Olovo;
- 4) Općinski sud u Zavidovićima za područje općina Zavidovići i Maglaj.  
Općinski sud u Zavidovićima ima odjeljenje izvan sjedišta Suda u Maglaju, za područje općine Maglaj;
- 5) Općinski sud u Zenici za područje općine Zenica;
- 6) Općinski sud u Žepču za područje općine Žepče.

**Općinski sud u Bosansko-podrinjskom kantonu - Goražde** je Općinski sud u Goraždu za područje općina Goražde, Pale-Prača i Foča-Ustikolina.

**Općinski sudovi u Srednjobosanskom kantonu su:**

- 1) Općinski sud u Travniku za područje općina Travnik, Vitez, Novi Travnik i Busovača;
- 2) Općinski sud u Bugojnu za područje općina Bugojno, Gornji Vakuf-Uskoplje, Donji Vakuf;
- 3) Općinski sud u Kiseljaku za područje općina Kiseljak, Fojnica i Kreševo;
- 4) Općinski sud u Jajcu za područje općina Jajce i Dobretići.

**Općinski sudovi u Hercegovačko-neretvanskom kantonu su:**

- 1) Općinski sud u Mostaru za područje Grada Mostara;
- 2) Općinski sud u Konjicu za područje općina Konjic, Jablanica i Prozor-Rama;
- 3) Općinski sud u Čapljini za područje općina Čapljina, Stolac, Neum i Ravno;
- 4) Općinski sud u Čitluku, za područje općine Čitluk.

**Općinski sudovi u Zapadnohercegovačkom kantonu su:**

- 1) Općinski sud u Širokom Brijegu za područje općina Široki Brijeg i Posušje;
- 2) Općinski sud u Ljubuškom za područje općina Ljubuški i Grude.



**Općinski sud u Kantonu Sarajevo je:** Općinski sud u Sarajevu za područje općina Stari Grad Sarajevo, Centar Sarajevo, Novo Sarajevo, Novi Grad Sarajevo, Ilijaš, Vogošća, Hadžići, Ilidža i Trnovo.

**Općinski sud u Kantonu 10 je:** Općinski sud u Livnu za područje općina Livno, Glamoč, Drvar, Bosansko Grahovo, Tomislavgrad i Kupres. Općinski sud u Livnu ima odjeljenje izvan sjedišta Suda u Drvaru, za područje općina Drvar i Bosansko Grahovo i odjeljenje u Tomislavgradu za područje općina Tomislavgrad i Kupres.